

123 en þegar þau um garð gengin eru, ganga kirkjugjöld úr hinni fyrirhuguðu Innra-
8. sept. Hólmssókn til þeirrar kirkju, og sje hún síðan undir umsjón og fjárhaldi safnaðarins,
og loks að messað verði í Innra-Hólmskirkju 3. hvern helgidag á sumrum, en 4. hvern
á vetrum.

Þetta undanfelli jeg ekki hjer með þjónustusamlega að tjá yður til þóknan-
legrar leiðbeiningar og frekari birtingar og ráðstöfunar.

124 Brjef landshöfðingja til biskups um hjónavígslu í heimahúsum án leyfis-
14. sept. brjefs. — Eptir að hafa fengið þóknlegt brjef yðar, herra biskup, dags. 1. p. m.,
viðvíkjandi vanrækslu nokkurra presta í því, að hlíða fyrirmælum tilskipunar 30. apríl
1824, að því leyti sem það hefur komið fyrir, að nokkrir prestar hafa leyfisbrjefslaust
gefið hjón saman í heimahúsum, með eða án undangenginna lýsinga, og það þótt ekki
væru sjerstök sjúkdómsforföll eins og gjört er ráð fyrir í 16. gr. nefndrar tilskipunar, enda
vanrækt að tilkynna slíkar undantekningar samkvæmt fyrirmælum nýnefndrar greinar,
skal jeg hjer með, vegna málsbóta þeirra, er þjer tilfærið, jafnframt því að tjá yður, að
við svo búið má standa að því er snertir pá tvo presta, sem þjer þegar hafið veitt á-
minningu fyrir ofangreint embættisafbrot, þjónustusamlega leggja fyrir yður að veita
öðrum prestum, sem hafa látið sjer hið sama á verða, alvarlega ofanigjöf, og tjá þeim,
að þeir muni verða látnir sæta ábyrgð fyrir embættisafglöf, ef slíkt kemur fyrir optar.

Út af frekari fyrirspurnum í frammannefndu brjefi yðar skal yður þjónustusamlega
tjáð til þóknalegrar leiðbeiningar, að það er engum vafa undirorpið, að prestum ber að
senda tilkynningar þær, sem um ræðir í 16. gr. tilsk. 30. apríl 1824 með nægilegum
skilríkjum til hlutaðeigandi prófasts áleiðis til biskups, og sætir það eptirlitum prófasta,
að prestar vanræki ekki þessa skyldu sína, sem á þeim hvílir í hvert skipti sem heima-
vígsla fer fram án leyfisbrjefs, til þess að sjeð verði, hvort fullnægjandi ástæður hafi
verið fyrir hendi. Allar slíkar tilkynningar ber biskupi síðan að senda til landshöfð-
ingja einu sinni á ári. Um tilfelli þau, sem þjer hafið orðið vísari að komið hafi fyrir
á undanförunum árum, þarf eigi að senda sjerstaka tilkynningu, með því að þau mál á-
lítast til lykta leidd með áminningum þeim til prestanna, sem að framan ræðir um.

125 Brjef landshöfðingja til stiptsyfirvaldanna um lántöku handa prestakalli
20. sept. til húsbýggingar. — Samkvæmt tillögum stiptsyfirvaldanna í þóknalegu brjefi, dags.
19. f. m. og eptir beiðni prestsins að Kálfholti, sjera Ólafs Finnssonar, er hlutaðeigandi
prófastur hefur lagt meðmæli sin með, vil jeg hjer með veita leyfi til þess, að tjeður
prestur taki 2500 króna embættislán upp á Kálfholtsprestakall, til þess að koma upp á
prestsetrinu Kálfholti vönduðu timburhúsi, 10 álna löngu og 10 álna breiðu, með þeirri til-
högun og þannig úrgarði gjörðu, sem fram er tekið í brjefi prestsins til stiptsyfirvaldanna, dags.
20. júní p. á., og komi hús þetta í stað innistofu, baðstofu, búrs, eldhúss og bæjar-
dyra með göngum til baðstofu og eldhúss, svo og skemmu, er nú eru þar bæjarhús.
Lántökuleyfið er bundið þeim skilyrðum:

1, að lánið sje að fullu endurborgað eigi síðar en á 25 árum með $\frac{1}{25}$ á ári auk vaxta.